

8. Qui arcu haud inani instructus, postquam filio suo K^SHEMADHANVANI, civibus felicitatem parare scienti, patientia prædito, terram tradiderat patienter in sylva subiit castigationes.

9. Huic etiam filius, erat, diis similis, in prælio exercituum dux, cujus nomen DEVÁNÍKAS, in agminis vocabulum exiens atque a dei vocabulo incipiens, in tergemino cælo etiam celebre redditum est.

10. Ut pater per hunc filium, ei placere studentem, gaudii paterni participes fiebat, sic filius etiam filii gaudio fruebatur per hunc patrem, ipsius amantissimum.

11. Illorum prior, virtutum plenus, sacrificus, postquam quattuor tribuum onus diu sustentatum in filio suo, qui ipsi similis erat, deposuisset, abiit in cælum sacrificarum.

12. Ejus filius modestus, blandiloquus, amicis æque ac inimicis gratus erat: nam verbum dulce, semel prolatum, vel cervos timidos capere valet.

13. Ille, AHÍNAGUS appellatus, integro brachiorum robore præditus, universam terram regebat, atque consuetudinem cum hominibus abjectis evitans, quamquam juvenis, liber erat ab omni intemperantia perniciosa.

14. Hic, virorum discriminis gnarus, viro primo similis, terram aggresso, quattuor illis agendi rationibus, nunquam ad irritum redactis, post patrem suum idoneus quattuor plagarum erat dominus.

15. Cum ille hostium victor iter in alterum mundum ingressus esset, LAKSHMIS colebat filium ejus PÁRIYÁTRAM, qui capite suo excelso ipsum PÁRYÁTRAM montem excellebat.

16. Ei filius erat SILAS, eximiæ indolis, cujus pectus æque latum erat ac lapis in quo aromata conteruntur; qui, quamquam hostes sagittis devicerat, laudatus pudore suffundebatur.

17. Ille, vir haud reprehendendi animi, cum hunc juvenem intelligentia præditum regni participem fecisset, voluptatibus fruebatur: nam regum munus, præcludens a voluptate, occupationibus est obrutum.

18. Hunc, voluptatibus animum moventibus haud satiatum, ob pulchritudinem suam inprimis ad puellarum oblectationem aptum, cepit senectus, fruendi impotens, atque præter necessitatem invida.